



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las sequintas fatschendas:

Società da fabrica Prasad-cher

Il cussagl ha refusà divers recuors cunter il proget per üna chasa cun plüssas abitaziuns sün parcella 2146 in Prasad-cher. Il proget correspuonda plaina-maing a la ledscha da fabrica sco eir a las prescripziuns dal plan da quartier Prasad-cher I.

Pendicularas Motta Naluns: lantschas d'innaiver

Las Pendicularas nun han demontà quista prümavaira tuot las lantschas d'innaiver. Las PSFS han motivà quai cun ün problem tecnic e dumandà al listess mumaint schi pudessan laschar in avegnir üna part da las lantschas tuot on.

Tenor il permiss da fabrica füssan da demontar da prümavaira tuot las lantschas. I dà però lös ingio cha la demontascha es colliada cun difficultats e tuot tenor eir cun dons vi da las lantschas. Da tschella vart preferischa il giast da stà üna natüra intacta sainza indrizs technics. Per discuter la dumonda a fuond e trar üna decisiun ha il cussagl institui üna pitschna gruppa da lavur cun rapreschantants da las pendicularas, dal turissem, da l'agricultura, dals vaschins e dal cussagl cumünal.

Müdamaint da zonas pro l'OEB

Per pudair realisar il nouv tract d'operaziun ha dumandà l'OEB al cumün da müdar üna part da la zona da god suot l'ospital vers süd in üna zona per fabricats publics. Il cussagl ha decis d'instradar la procedura da planisaziun necessaria.

Nationalpark Bike Marathon

Il giubileum "10 ons Bike Marathon Parc Naziunal" es gnü festagià tanter oter cun ün arrandschamaint in Trü (anteriura disco "Sounds"). Il cumün ha desisti al fit da CHF 750.00 in sen d'üna promoziun dal Bike-Marathon e dat ün permiss d'ustaria da festa cun limitar l'avertüra sün las 03:00h.

Restorant Trü

Il restorant Trü es gnü serrà definitivmaing als 7 avuost 2011. Per chi's possa spordscher als giasts dal bogn avert e lura eir dal glatsch d'ürant l'inviern almain ün provedimaint minimal venda il chaschier da l'implant da sport bavrondas e "snacks". A partir da l'inviern chi vain dess ün gastronom spordscher ün servezzan da catering aint il restorant, almain pels arrandschamaints da curling e per oters interessents chi giavüschan da far adöver dal restorant. Per inserat vain tscherchè inchün chi vess interess per quist servezzan.

Nouv reglamaint davart las auas e la chanalisaziun

Üna cumischiun cumünala ha elavurà il sböz per ün nouv reglamaint. Il cussagl til ha discus e deliberà la versiun definitiva pella procedura da consultaziun. La votaziun a l'urna es previssa pels 27 november, e la populaziun vain infuormada in üna radunanza d'orientaziun als 24 october.

Zonas da repos d'inviern pella sulvaschina (Winter-Wildruhezonen)

Üna cumischiun cun rapreschantants dal cumün e da differentas gruppas d'interess (turissem, manaders da gitas, chatschaders etc.) s'ha occupada culla tematica surmanzunada. Il cussagl ha deliberà las propostas da quista cumischiun per l'exposiziun publica e per l'inoltraziun al Chantun chi farà ün'examinaziun preliminar. La votaziun a l'urna davart quist proget es previssa pels 27 november, e la populaziun vain infuormada in üna radunanza d'orientaziun als 24 october.

Promoziun d'hotellaria

Per promover l'hotellaria po il cumün relaschar sün dumonda la taxa pel permiss da fabrica per progets d'hotels sco eir admetter cha las taxas d'attach (aua e chanalisaziun) pon gnir pajadas infra 10 ons. Üna dumonda correspundenta es gnüda fatta pella part nouva da l'hotel Arnica (proget "Dschember"), il cussagl cumünal tilla ha acceptada.

Seguondas abitaziuns

Illa discussiun davart las seguondas abitaziuns mancan suvent cifras concretas. Ingün nu sa dir precis che cuosts cha quistas abitaziuns chaschunan al cumün e che entradas ch'ellas genereschan. Il cussagl ha decis perquai d'incumbenzer üna firma specialisada d'eruir las cifras respectivas. El ha deliberà ün import da maximalmaing 10'000 francs.

Surdattas da lavuors

Sanaziun da la via da Muntclü (God da Rès)

– Koch SA, Ramosch

Provedimaint d'aua (condot Manaröl - reservuar Liuns, 1. etappa)

– Submissiuns, proget d'execuziun e survaglianza da fabrica: Caprez
Indschegners SA, Scuol

Provedimaint d'aua (condot Manaröl - reservuar Liuns)

- Preproget, proget da fabrica, preventiv da cuosts e dumonda da fabrica per implants dadour las zonas da fabrica: Caprez Indschegners SA, Scuol

Chanalisaziun e provedimaint d'aua in Porta

- Lavuors d'impressari: Bezzola Denoth SA
- Installaziuns sanitarias: Stecher SA

Dumondas da fabrica

Il cussagl resp. la direcziun han dat ils seguaints permiss da fabrica:

- Annatina Alini: butia e suost per laina, Manaröl (parc. 1226)
- Silvio Clavuot: implant per s-chodar cun SolarEis, Chantröven (parc. 643)
- Monika Doessegger + Jürg Inauen: tet sur la terrassa, Liuns (parc. 2014)
- Jon Andri + Christiana Fliri: cellas solaras per prodüer aua choda, Avant Muglins (parc. 275)
- Jachen Andri Florineth: veranda d'inviern, Liuns (parc. 1629)
- Michael Kuffler: mür d'üert, Manaröl (parc. 293)
- Società da fabrica Prasad-cher: chasa cun plüssas abitaziuns (parc. 2146)
- Paul Renn: chamonna provisorica sper La Palma, Schlivera
- René + Lilo Richoz: mür da sustegn, Val (parc. 1693)
- Marianne Sägesser: sondas geotermicas, Senda da Scoula (parc. 478)

sco eir per progets plü pitschens sco cellas solaras, lavuors da contuorns, tablas da recloma, sanaziuns energeticas, müdamaints interns eop.

Il cussagl ha plünavant refüsà la dumonda preliminar per ün fabricat nouv giò'n Punt: il proget es da redimensiunar per ch'el s'integrescha plü bain i'ls contuorns.

Il cussagl ha eir discuss üna dumonda per plazzar üna sculptura sün üna parcella privata, però a l'ur da la via. Siond cha la sculptura dà ferm in ögl e pudess esser perquai ün disturbi pel trafic vain miss in vista ün permiss be pel cas chi nun es pussibel da chattar ün oter lö e culla cundiziun cha la distanza fin pro la via saja grond'avuonda.